

# Soo Vyyl Protäschtwähler

Dr 24. Oggtober goht in d'Anaale,  
wäge de schwyzer Rächtsrutschwahle.  
Au mir Bebbi sin iiberschprunge, mit Handkuss,  
zem Schwyzerisch Verangerete Populismus.  
Die Langwyylig Politigg hänn mir nimm welle  
Und d'lische 12 fir uns lo zelle.

Dr Jean Henry Dunant isch die ideali Wahl,  
fir d'Geegner wird är bistimmt zer Qual.  
Mit sym Skalpell duet är was wuecheret schnyyde,  
do mien alli vo linggs bis Mitti lyyde.  
Au si Alter kennt nit besser syy,  
so isch är glyy als Altersbresidänt derbyy.

Dr Jean Henry isch aigentligg e Wälsche,  
ab jetzt dien mir si Naame fälsche,  
zem e weenig besser dichte z'kenne,  
dien mir ihn liebevoll Hans Heiri nenne.

Är sait als Wahlverspräche ganz ellay:  
„Ych nimm fir's Schwyzer Volgg Partey!“  
Die Ussaag zyggd vo Scharfsinn und Vyyl Phantasie,  
dä Maa setzt sich in dr Regierig fir uns yy.  
Nach so Verspräche kasch ruehig schloofe,  
dä zaigt's de Liebe und de Doofe!  
Är duet uns Bebbi wiirdig verdrätte  
Und mol so richtig uusejätte.

Als Oberscht mit stailer Laufbahn,  
haltet är nit vyyl vom Konsenswahn.  
Wenn's druff a kunnt, wais är d'Waffe z'wetze  
Und sich politisch duure z'setze.

Si Leesig vom Granggekasse-Prämie-Probleem,  
finde mir ganz aifach scheen.  
D'Prämie aabe, dr Sälschtbihalt uff,  
wenn de grangg bisch duesch e Schnäpsli suffe,  
oder lyydisch halt e glai weenig Quale,  
gsetzt dr Fall, de kasch nit zahle.....  
s'Bescht wär, de wurdisch nie me grangg,  
fir dr Aarbetgääber und fir d'Bangg.

Fir d'Geegner vom Atomstroom,  
findet är nur Spott und Hohn.  
Äntligg mol ain wo nit nur nai sait  
Und frische Wind vo do no Bäärn trait.

Grien, linggs birgerlig, liberal und au root,  
die alli drybt d'SVP in politisch Doot.

D'Fetz duet ney bi dr SP pochere,  
dr Hans Heiri wot schyynts nit go blochere.  
Är sait: "Mir sinn dr Basler Fliigel,  
mir kemme vo hinter de siibe Jurahiigel."

Do froog ych mi wie jede rächde Basler-Wähler,  
isch ächtscht die Wahl nit doch e Fähler?

S'isch schweer sich in Bäärn go duuresetze,  
gege Rächstainer, Eymaa und au d'Fetze,  
wenn kai Rugghalt hesch, weder vo Ziri no vo Bäärn.  
Dr Basler Fliigel liggt deene eender fäärn.

S'syg alles Wischi Waschi und Laari Faari,  
was kunnt vo dr Angelika Zanolari,  
bihaupte die Nätte und die Braave  
und maine s'syg alles fir in Haafe.  
S'isch allewyyl e Froog vom Gschmagg,  
die solle nur läschtere, das elitääre Pagg.

Aagääblig syg die Bebbi-SVP,  
(das haist ibrigens nit „Si vous plais“,)  
nit uff d'bärner Ideologie bizooge  
und au nit zircherisch, das syg glooge.  
Me haig schyynts e-n-anderi Gwichtig.  
Jetzt froog ych mi, isch mi Wahl richtig?

Zem sich vo de Zircher gnueg ab z'heebe,  
duet me e Naamensänderig iberleege.  
Populistisch-Ultra-Konservativ, wär unseri Wahl,  
abkirzt „PUK“, fände mir ideal.....

Em Adam si dimmliggs Lächle z'komentiere,  
das wurd aidytig z'wyt fiehre,  
es liggt is zuedäm all zue färn,  
Hauptsach dä isch nit Ständeroot in Bäärn.

Es bruucht ihn nämmlig do z'Basel unde,  
fir die neggscht Regierigsroots-Runde.  
Zem Bispill an Stell vom Ueli Vischer,  
als Ober-Finanze-Mischer.

Fir s'Erz-Dep bruuchts nit all zu vyyl,  
dr Marc Meyer wär s'SVP-Ziel.  
Si sueche au no ain fir in d'Justiz,  
vom Hamatschu nimmt niemer me Notiz.

An Stell vo dr Barbara, d'Angelika,  
d' Schmidli Daniela, statt d'Veronica,  
und au dr Levin kunnt no dra,  
deert mechte si dr Madöri Berni ha.

Au s'Bolizey-Dep vom Jürg Schild,  
basst fir dr Bachmaa genau in s'Bild.  
Dr Kurt wär als Drogischt,  
bistimmt dr bescht Basler Bolizischt.

Und so mechte si, persee,  
die ganz Regierig ibernee.....

Si haue schyynts alli no in d'Pfanne,  
d'Bundesrootswahle sin nur e glaini Panne.  
„Mir gsehn uns denn speeter bi Philippi  
und mache-n-uff alli Geegner pipi.“

Und so bi-n-yeh noo-di-noo,  
aber sicher zer Iberzyygig koh,  
s'näggscht Mol due-n-yeh doch mehr dängge,  
bivor yeh deene d'Stimm due schängge.

Vyylicht isch alles nur kalti Luft,  
dr Urschrey isch jo au im Nyt verpufft.  
Vyyl Tamtam, Trara, Nainai und Joojoo,  
und was isch derbyy uusekoh.....!?

*D'Laddärne-Uusstellig isch vom Määntig znacht, em 13. Merze,  
bis am Mittwoch demorge, em 15. Merze, uff em Minschterplatz.  
Mir fraien is uff Ihre Bsuech.*